

ALO, INDENANT!

O vin finît, cun chest numar, un an di vite. Di vite? Un an di lote cence padìn, pitost.

Ma chest sfuei al è nassût cun chel intindiment: di fâ vuere `es cjacaris e ai cjacarons, di spacâ il polvar ai biâz indurmidîz, di scjassâ l'aghe dal stomi ai furbons ch'a vuelin peâ il mus indulâ che ur torne cont, di doprâ il mani de scove cui gramolons di furviè che si son fate la tane in cjase nestre, intant che miârs dai nestris a strassinin il baûl pes stradis dal mont.

Si sa ch'ò vin pescjade la code a tanc' di lôr, ch'ò vin stiçât il vues rabiôs a putròs, ch'ò vin fat lâ in stuart la bocjade a plui di un, ch'ò vin disturbât il rumi a cualchi âtri. E ancjemò a vin puartât scandal, cul nestri lengaç crût e garp a une vorute di timoradis e sglonfis di retoriche nazionalistiche o di batude unitarie.

Ma andi vino sbalgjadis tropis? Tropis voltis vino cjapade la musse? Tropis voltis ju faz nus àno dât tuart? Tropis voltis vino scugnût mudâ sunade?

Il lengaç ch'ò doprin in chest numar al è chel instes, tâl e cuâl, ch'ò vin doprât tal prin. Pe nestre strade o vin cjaminât dreiz: cun pocje diplomassie, ma cun dute la scletece. O vin dute di mire une robe sole: l'intares dai furlans, cuintri di duc' chêi, sot di cualunche bandiere o in non di cualunche idèe, a cirin di fâsi strade a spesis dai dordei.

Si vin faz unevorute di nimîs, ma ancje di amîs cjalz e sigûrs.

O vin mostrât, in pratiche, che la nestre lenghe e va ben par tratâ cualunche cuistion e no dome par contâ fufignis o par inbastî vilotis.

Tiradis lis sumis, no vin nuje tal tacuìn, o vin sacrificât un grum di tinp, di sium, di passiense e di flât, o vin trascurade la profession e i nestris intares, ma o podìn freâsi lis mans e dî: Alo, indenant!

(tirât fûr de «Patrie dal Friûl» dal 23 di fevrâr dal 1947)